

Postzegels en oploskoffie.

tenakter deur Ina Nieuwhoff

Kluchtig tenielstuk in 1 bedrief veur 2 jongs en 4 wichter.

Mans woont hiel tevreden in zien hoesie en vermaakt zich, naost zien wark op het gemientehoes, met zien postzegelverzaomeling.

Roel, de kameraod van Mans, hef veur Mans veur wichter regeld die komt speeddaten, want hij vindt het tied worden dat Mans een schier wicht leert kennen waor hij zien leven met kan dielen.

Mans hef regeld dat er een bekend wicht langskomt um Roel een lessie te leren. Maor of dat lukt? Zit er tussen de kandidates een wicht waor Mans verder met zul willen of blef hij eeuwig vrijgezel en is daor een reden veur?

Postzegels en oploskoffie.

Kluchtig tenielstuk in 1 bedrief
veur 2 jongs en 4 wichter.

Schreven deur Ina Nieuwhoff.

Oet dizze tekst mag niks kopiëerd of opvoerd worden zunder oetdrukkelijke, schriftelijke toestemming van te veuren deur de schriever.

Ina Nieuwhoff

Almaatsweg II

7856TJ Benneveld.

inanieuwhoff@live.nl

0591 36 25 15 / 06 25 22 80 11

Postzegels en oploskoffie.

Rolverdeling :

Mans	vrijgezel
Roel	kameraod van Mans
Bertha	kandidate 1
Ingrid	kandidate 2
Hilda	kandidate 3
Mien	kandidate 4

Decor: hoeskamer of de suggestie van een hoeskamer.

Taofel met bureaulaamp, 1 stoel der achter. Postzegelalbum met loep, kraanten etc. op de taofel, beetje rommelig mag. Pot met oploskoffie, beker, stoel die bij de taofel zet kan worden. Waterkoker.

Scene 1.

(Roel probeert Mans een strik veur te knuppen, Mans verzet zich daar hevig tegen)

- Mans: Au, ij doet mij zeer, au, man, hol toch op, waar is dit allemaol goed veur?
- Roel: IJ kunt die wichter niet ontvangen in die vale spiekerboks en die geblokte boezeroen diej altied an hebt, daar wil gien vrouw tegenan kieken, geleuf mij mar! IJ moet een goeie indruk maken, dus netties antrökken wezen in moderne kleren. Stao nou ies stil, zo krieg ik die strik nooit vast. En kam je haor!
- Mans: Nou, zie moet mij mar nimmen zoas ik bin. Auw, niet zo strak! Ik krieg ja hielemaol gien aodem meer!! Man, ik stik zowat.
- Roel: Zo, klaor. Zo kuj je zien laoten. Ik zeg maor zo: de eerste blik is een daalder weerd. Kiek, ik heb nog even een vraogenliet veur je maakt veur het geval je niet meer weet waar aj over praoten moet. Lees maor even deur. En ij moet ok wat over jezölf vertellen, heur, die wichter moet weten wat veur een kerel ij bint. Ik zal alvast even wat te drinken klaorzetten. *(af)*

Scene 2.

- Mans: *(Leest veur)* Wat veur wark doeje? Wat bint je hobby's ? Hoe zöt je familie d'r oet? Hej ok hoedieren? Nou, dat giet vast wal lukken. Zo, nou kan ik nog wal evenpies naor mien postzegelties kieken. *(kek met loep in album)*
- Roel: *(komt met wat flessen en glazen an, zet dat op taofeltie,ok wat happies)* As die wichter d'r bint moej je netties veurstellen en ze direct wat te drinken anbieten en een stukkie worst of keze.
- Mans: Ja, ja, ik weet wal hoe het heurt, dat hef mien moe mij echt wal leerd, heur.
(de bel giet)
- Roel: O, daar zuj de eerste kandidate al hebben. Doe je colbertie an. *(af)*

Scene 3.

- Mans: Man, man, wat een poppenkast. *(strek het haor nog even plat, trekt zien jassie an)*
- Roel: *(op met Bertha, stoer wicht, net een kerel)* Kiek, Mans, dit is Bertha. Ik gao nog even naor de winkel wat drinken ophalen, ik bin d'r zo weer.
- Mans: Goeiemörgen, ik bin Mans Kupers, welkom.
- Bertha: Bertha Boer, aangenaam. *(kek de kamer rond)*
- Mans: Gao toch zitten, hej zin an een glassie drinken? Wat woj hebben?

Cola, sinas, of ...

Bertha: Bier, doe mij mar bier. Dat andere slootwater dat lus ik niet, nee, ik huuf er gien glas bij. *(drinkt hiele flessie in 1 keer leeg)*

Mans: Zo, hee, ij kunt ze wal kwiet worden, dus... nou ... nou ... enne Kunnen ij de weg goed vinden?

Bertha: Ja, natuurlijk, aans zat ik hier toch niet. Man, wat ja een domme vraag.

Mans: Bej met de auto of bej met de bus kommen?

Bertha: Nee man, ik bin op de motor, dat giet veul sneller en dan kuj mooi overal tussendeur sjezen.

Mans: Zo, dus ... op de motor ... zo nou ... enne ... dus eh ... oh, de vraogenliet:
Wat veur wark doeje?

Bertha: Ik bin timmerman, meestal in de neibouw. Soms doe ik ok wal renovatieprojecten.

Mans: Zo, dat is een mooi beroep, past ok wal bij je, liekt mij zo.

Bertha: Ja, mooi man, zo met de kerels under mekaar. Maor momenteel zit ik de ziektewet, ik bin een maond leden met de motor over de kop vleugen. Ik had zowat alle botten breuken, maar gelukkig waren ze allennig maor kneusd. Maor het giet alweer de goeie kaant op, dus ik haar mooi de tied um hier te kommen kennismaken.

Mans: Oei, dat zal wal een klapper west wezen... Het is mar goed dat ij niet zo'n fien wichtie bint. Ik wark trouwens op het gemientehoes.

Bertha: Ín het gemientehoes, ín niet òp. IJ zit toch niet op het dak de dakpannen te poetsen, of wal soms?

Mans: Nee, jao, ij hebt geliek, jao, in het gemientehoes, ik bin de gemiente...

Bertha: Secretaoris zeker. Jao, dat kan ik wal zien, zo ziej d'r ok wal oet, zo mooi netties in't pak, mooi colbertie ok. Zooo ... nou ... dat is mooi, dan verdien ij vast ok wal een mooie stuver.

Mans: Nou, dat valt wal wat met heur, het is prachtig wark, maor ik heb niet het allerdikste loon met mien baan as gemiente...

Bertha: Dat past mij wal, een kerel met een goeie baan, gemientesecretaoris, mooi, dan kan ik eindelijk ies ophollen met warken.

Mans: Nou, zo wied is 't nog lang niet, dacht ik zo. Eerst maor ies ofwachten en ehh... O, nou ... dus ...nou *(ongemakkelijk, döt strik wat lossen, trekt jassie oet)*

(kek weer op de vraogenliet) Hej ok hobby's?

Bertha: Ik doe an diepzeeduken en parachutespringen en autocrossen. En motorrieden natuurlijk. As 't wat wordt met oes dan kuj mooi met mij met gaon toeren, kuj mooi bij mij achterop zitten. Of duur ij dat niet?

Mans: O, ik heb nog nooit op een motor zeten, maor dat duur ik vast wal. Ik heb ok een hobby, ik verzaamel postzegels, oet binnen- en boetenlaand, dat is natuurlijk lang niet zo spannend dan je hobby's.

Bertha: Als mien hobby's, niet dan.

Mans: Als je hobby's dan..... *(kek weer op de liest)* Hej ok hoesdieren?

Bertha: Jazeker, ik heb grote glazen bakken en daor hol ik spinnen in, van die mooie grote exemplaren. De tarantula, die is zo mooi, met die haorige poten en die mooie streepies op de rug. Die bint zo lekker zacht. Weet ij wal hoeveel poten een spin hef?

Mans: Daor heb ik gien idee van, zukke dikke spinnen kom ik ja met mien wark op het gemientehoes, ik bedoel, in het gemientehoes, met mien wark as assistent op de kopieerkamer gelukkig niet tegen. En hier thoes heb ik allennig mar een kat. Trouwens, die is ok hiel lekker zacht, woj hum even aaien?

(löp naor de deur) Poes poes poes...

Bertha: Wat? Bin ij gien gemientesecretaoris? Wat bin ij veur een miezerig klein opscheppertie, mij een ziede spek veurhollen en nog niet iens een halve worst te bieden hebben? Zo'n kerel wil ik niet. Wat doe ik hier nog, mien ij non dat ik zo'n wattie wil? *(stiet op, löp naor de deur)* Bej non hielemaol bedonderd... lillijke. ..

(moppernd af)

Scene 4

Mans: *(opgelucht)* Poehhhh, wat een mèn's... gelukkig, die is vort, dat zukke vrouwlu bestaot ... Brrrr ... Het wordt je dood aj met zo ien trouwd bint ... brrrr.

Die voort je an de spinnen ...

Eerst mar ies een koppie koffie. *(döt poging)*

Ingrid: *(op, kek veurzichtig um de deur)* Moi Mans, bej allennig?

(Mans wenkt heur binnen) Ik zag net een dikke motor de dam ofstoeven, die reed mij zowat understeboven.

Mans: Dat was de eerste kandidate, Bertha Boer ... brrrrr. Bliede dat die vot is, wat een haaibaai. Die is precies zoas e d'r oetzag, net een gorilla. Je zult zo'n vrouw toch mar in hoes hebben, dan kuj zölf wal in het stookhok gaon wonen.

Hielemaol niks van wat ik zee was goed en toen ze d'r achterkwam dat ik gien gemientesecretaoris bin, maor in de kopiëerkamer wark, was ik hielemaol te min.

Ingrid: Dat is gien vrouw veur je, ij moet ien hebben die wal een beetie um je deinkt en je goed vindt zoas ij bint, of niet dan. Zeg, waar is Roel?

Mans: Hij is even naor de winkel, komt er zo weer an. Hoe is 't met je? Bin ij d'r klaor veur?

Ingrid: Jazeker. O, Mans, wat bin ik bliede daj mij hebt verteld dat Roel veur jou dizze speeddate regeld hef en wat hej een goed plan bedacht um zien aandacht weer op mij te laoten richten.

Mans: Het is ja niet normaal zoas die jong met je umgiet. Nou, as ij mien vriendin waren dan wus ik het wal. Ik leut je gien moment allennig. Hij mag zien handen dichtkniepen met een wicht zoas ij. Hopelijk leert e zien lessie en gaot hum de ogen open.

Ingrid: Dat is lief van je. Ik heb mij via de mail bij hum anmeld under de naam Leonie. Hij hef warkelijk gien idee dat ik hier bin, hij deinkt dat ik gewoon op kantoor zit.

Mans: Wij doet zoas wij het afspreuken hebt, wij zult hum ies even goed an 't verstand peuteren dat e beter um je denken mut.

Ingrid: Wat zal e opkieken, nou maar hopen dat e d'r flink jaloers van wordt. Stil ik heur wat ... daor komt e an ... snel *(giet bij Mans op schoot zitten, heur heufd in zien hals zodat Roel heur niet herkent, smokt er flink op lös)*

Scene 5

Roel: *(op)* Aha, de tweede kandidate is er ok al, zie ik.
Zoouou ... dizze maakt er wal wark van, niet? Tjonge jonge.

Mans: Ja, dat stiet mij wal an, zo vuul ik geliek wat veur vleis ik in de kuup heb. *(pakt Ingrid nog even stevig vast)*

Roel: Zeg, juffer ... woj ok wat drinken hebben, of hej daor gien tied veur? Nou, nou, dat giet ja van halem... Wat heb ij ja een mooi bloesie an, zo ien hef mien vriendin ok...
(Roel loert naor ze)

Ingrid: *(met verdreide stem)* Een glaasje water graag.

Roel: Komt veur de bakker, juffer. *(af)*

Scene 6

Mans: Hij hef het niet in de gaten, geleuf ik. Hoewel.. hij herkende je bloesie.

Ingrid: Stom van mij, dizze had ik ok niet an moeten doen. Dizze heb ik kocht toen hij jaorig was, hij vun hem wal mooi, zee'e.

Mans: Hij stiet je prachtig, mooie kleur ok. Nou ja, wat stiet jou nou niet mooi?

Roel: *(op)* Kiek, juffrouw, hier hej een glassie water, ij bint Leonie zeker? Ik zag daj op de fiets kommen bint, ij hebt net zukke fietstassen as mien vriendin, die hef ok van die rooien met bloempies.

Mans: Wat ja toevallig, net zo'n bloesie en nou ok al dezölfde fietstassen... Gao ij mar mooi in de keuken zitten, dan kun wij oeze kennismaking verder voortzetten en daor hebt wij je niet bij neudig.
(Roel af. Ingrid en Mans hebt de grootste schik, Ingrid lacht hardop)

Roel: *(op)* Ik heur een bekende stem... mar, mar... dat bin ij ja, Ingrid, wat doej nou??? IJ zit bij Mans op schoot te flikflooiën! Wat hef dit te betiekenen ??

Ingrid: Ja, ik zit bij Mans op schoot, dat hej goed zien. Ik dacht dat ik mij misschien maor een andere vriend op mus zuken, want ij hebt bijna nooit tied veur mij, bij je kan ik nooit

ies lekker op schoot zitten of gezellig naast je op de baank. IJ bint altied drok met aandere dinger. Ik kom altied op de leste plaots en dat wil ik niet langer.

Roel: Maar waarom hej dat niet tegen mij zegd? Daorveur huuf ij toch niet zo met Mans gaon zitten flikflooiën?

Ingrid: Ik heb het vaak genug tegen je zegd, maor ij heurt het gewoon niet umdat er altied wat aans is waor aj drok met bint, je kameraoden, de kroeg, je tillefoon, de voetbalclub... nuum mar op. Roel, zo wil ik niet met je wieder... ik wil nummer ien veur je wezen, met minder nim ik gien genoeg.

Roel: Maor Leonie, mien schattie toch, mien lieverd, ik wil je echt niet kwiet. IJ bint mien alles, mien toekomstige vrouw en de mam van mien kinder, teminnen, as ij dat ok wilt. Kom met mij met, dan praot wij boeten wal wieder. (*samen af*)

Mans: Hai, wat een gedoe, zo'n verkering. Hoewel, met zo ien as Ingrid.... Ach, nee, ij moet natuurlijk wal verliefd op zo'n wicht wezen, anders wordt het ja niks. En ik bin niet verliefd op heur. (kek oet 't raam) O, dat komt vast wal goed, ze smokt der al weer lekker op lös. Wat is het toch een mooi stel. Zo, mar ies even weer een koppie koffie maken, want dizze is al lang kold.

(*wil oploskoffie maken, d'r wordt klopt*)

Scene 7

Hilda : Goeiemörgen, ik bin Hilda Horst en ik kom kennis maken met Mans Kupers, bin ij dat? (*Löp keurend um hum hèn*) Zo, ij ziet er goed oet, as ik dat zo even zeggen mag. Oooo, wat een leuke vent bin ij, geweldig!!!! Wat heb ij prachtig haor, wat bin ij een schiere kerel, prachtig heur. Ik hoop dat ij mij ok een beetie mugt lieden, Mans.

Mans: (*veurzichtig*) Nou, ja, wat za'k d'r van zeggen. De eerste indruk is niet slecht, zeker niet. Kom, gao zitten, woj wat drinken hebben?

Hilda: Doe mar wat aj lös hebt, as d'r mar gien prik in zit, want dan heb ik direct de maog van streek.

Mans: Glassie appelsap dan mar? Woj d'r ok een koekie bij? Kiek ies, asteblijft. Kunnen ij de weg wat vinden?

Hilda: Ja heur, de busschauffeur hef mij oetlegd waor ik langs mus lopen, het is ja mar een eindtie vanof de halte. IJ woont hier mooi, zo lekker rustig in de straot en zo'n mooi hoesie.

Mans: Daor is inderdaod niks mis met, ik woon hier met hiel veul plezier.

Hilda: En met genug ruimte zie ik, da's mooi, want mien zuster mut wal met mij met verhoezen as ik hier kom wonen, want die kan niet zunder mij.

Mans: Wat? Nou ik weet niet of ik daor wal van gediend bin, ik

Hilda: Dat möt, anders giet het hiele feest niet deur.

Mans: Dat is mij ok wat, daor moet wij het later dan nog maor ies over hebben.

(kek op vraogenliest)

Heb ij ok wark?

Hilda: O, nee heur, daor heb ik hielemaol gien tied veur had. Ik heb mien aolen an 't end bracht en ok nog veur een old oompie zörgd, daor was ik drok genoeg met.

Mans: Ik wark op het gemienthoes op de kopieerkamer

Hilda: Ooooo ... op't gemientehoes ... wat mooi ja. Ik haar wal dacht daj zo'n mooie goeie baan zullen hebben. Dat liekt mij ok wal hiel mooi, zo'n mooie baan op het gemientehoes, mar ja, daor zult ze mij wal niet kunnen gebroeken, deink ik. Ik mag hiel geern handwarken, veural breien vin ik hiel mooi. *(haalt breiwarkie oet de tas)*

As ik hier bij je kom wonen dan brei ik de sokken veur je, en elke winter een mooie dikke warme trui. En een mooie dikke das en fijne haanschen met een bijpassende mus. Wat veur kleuren vin ij mooi, ik hol arg van gruen.

Mans: Ik vin blauw wal mooi, maor. ..

Hilda : O, jaaaa, ij hebt geliek, eigenlijks is blauw nog veul mooier as gruen, dan brei ik je een mooie blauwe trui, ja, ja, zo is 't. En ok mooie bijpassende blauwe sokken.

Ik vin het zo mooi um 's avonds lekker bij de kachel te zitten breien, zo gezellig.

Ik hol hielemaol niet van tellivisie kieken.

Mans: Nou, dat vind ik soms wal mooi, veural een spannende thriller en voetbal natuurlijk.

Hilda: Daor heb ij natuurlijk ok wal weer geliek an, sport kieken is eigenlijks ok veul mooier as breien, dat vin ik eigenlijks ok wal, non ij dat zo zegt, ja, ja, zo ist. Lekker koppie thee d'r bij.

Mans: IK hol zölf wat meer van koffie.....

Hilda: Nou ja, natuurlijk is koffie eigenlijks ok veul lekkerder dan thee, maor daor krieg ik altied zo'n zoerbranden van en ik kan er al hielemaol niet van slaopen.

Mien mamme had daor ok zo'n last van en mien zuster kan d'r ok niet tegen, zwakke magen hè, dat zit in de familie. Trouwens, wij hebt ok bar last van wintertienen en eksterogen. Dat bint ok familiekwaolen en verder kunt wij ok niet tegen. ..

Mans: *(grist het breiwarkie oet heur haanden, propt het in de tas, warkt haar in de jas)*
Weet ij wat ij doet, gao mar mooi weer hen je zuster, dan kun ij samen mooi even een koppie thee drinken en zitten breien op de bank. Hoe liekt je dat?

Hilda: Maor Mans, wij zit ja zo gezellig, ik haar eigenlijks dacht dat het wal wat kun worden met oes beide, wij verschilt ja niks van mekaar, wij kunt een hiel goed stel worden en as wij dan trouwd bint en een beetie opschiet dan kunt wij misschien ok nog wal an kinder deinken en een gezinnegie...

Mans: En as ij even opschiet, kuj de bus van 10 over nog pakken Dat liekt mij veul beter. Eigenlijks!

(warkt heur de deur oet)

Pffftfffff, meinsenkinder nog an toe, waor heb ik dat an verdiend, dat mens hef ja totaal gien eigen miening, wat arg.

(wist zwiet van veurhoofd) Eerst maor ies een koppie koffie, man, man, ik heb het ja glad drok. *(döt opnei een poging)*

Scene 7

(De bel giet, Mien komt op, grote koffer, emmer en mop en spuitbus desinfecteer-spul en pak met ontsmettingsdoekies)

Mien: Goeiemörgen, ik bij Mien Mulder en ik kom kennis maken met Mans Kupers. Bin ij dat? *(gef hiel stevige haand en maakt direct de haanden weer schoon met een doekie oet een pakkie, löp keurend om hum hèn)* Wat bin ij ja mar een schriel kereltie *(knep even flink in zien spierballen)* IJ wordt ok al een beetie kaal, hoe old bin ij eigenlijk?

Mans: Ik bin twee maond leden net...

Mien: Nou ja , leeftied döt er ok niet zoveul toe, aj mar gezond en sterk bint. Kun ij nog goed de tuun schoffelen en de vuilniscontainer an de straot kriegen? Kuj nog wal een eindtie fietsen? Of heb ij soms al zo'n elektrisch ding neudig?

Mans: Dat giet allemaol nog wal aordig goed, heur en ik kan ok nog wal een flink eind.....

Mien± Mooi, want ik wil elke zundagmörgen een lekker eindtie fietsen. Nou, kun ij dat nog wal? Want ik wil gien aole kerel die altied mar binnen zit te koekeloeren, begrepen? En nao het fietsen gaot wij gezellig koffie drinken bij mien moe in Loeksham. Behalve as het regent natuurlijk, dan gaot wij met de auto. IJ hebt toch wal een auto?

Mans: Ja, ik heb wal een auto, ik heb een ...

Mien: Mooi zo , dat klinkt goed. Hoe giet het je met het eten? Ik bin arg vegetarisch, dus vleis komt bij mij niet in hoese. As ik hier straks bij je in woon dan eet wij allennig nog maor macrobiotisch, volkoren en biologische dinger. Het is daj het mar even weet.

Mans: Nou, met een lekker karbonaadtie is aans niks ...

Mien: Mooi zo, dat is dan ok regeld. Mar wat zie ik hier, dreuge worst? Gadverdarrie, hoe kun ij dat nou eten, die vieze rommel is van dieren maakt, van zulke mooie lieve koenen die je zo an kunt kieken met die grote broene oogies, hoe duur ij! Dat komt er straks niet meer in!

Mans: Nou. Dat is niet te versmaden, ik lus elke_aovend wal zo'n lekker stukkie worst....

Mien: Man, zeur toch niet zo, daor hol ik hielemaol niet van. Trouwens, dat bin ik ok niet wend, mien veurige verkering zeurde nooit want die zee nooit wat, dus ik heb ok geern dat ij dat ok niet doet as ik bij je in woon. Zo, dus, dat is dan ofspreuken? Mooi zo. *(trekt jas oet, hef jasschort al an, knupt doek um hoofd)*

Mans: Wat zal der gebeuren?

Mien: *(drukt hum de emmer in de haand)* Haal ij mij mar ies even een flinke emmer hiet water op dan kan ik alvast begunnen met schoonmaken, want veur dat ik intrek wil ik eerst alles super schoon hebben, alles mot desinfecteerd worden. Hop hop, en snel een beetie. *(giet met spuitbus rond)*

Mans: *(af, haalt water)*

Mien: *(kek rond, legt hier en daar wat recht, legt kraanten op een net stapeltie, etc.)* Wat een rommeltie hier. Dat zal ik ies even mooi oprumen. Wat is dit, postzegels? O, harregat wat smerrig. Wel wet wel daor allemaol an hef zitten te likken ... brrrr. Die gaot straks as allereerste de deur oet , bah. *(maakt handen weer schoon met een doekie)*

Neie meubels moet er kommen, nei behang, neie gerdienen, mooi kleurtie varf op de deuren... enzo. Wij zult er ies even een mooie nette woning van maken!!

Mans: *(op)* Kiek, hier hej een emmer waoter, maor wat woj non toch? IJ gaot hier toch niet lopen te poetsen? Wij moet mekaar eerst maor ies wat beter leren kennen.

Mien: Natuurlijk wal, steriel mot het worden, aans kom ik niet bij je wonen. *(zöt de oploskoffie)* Drink ij dizze rommel? Dat mot straks wal aans, dan wil ik zo'n mooie Italiaanse koffiemachine die koffie maakt met varse koffiebonen en die drinkt wij dan oet van die mooie kleine chique koppies. Die gaot wij mörgen direct ophalen bij de Blokker, begrepen? En zulveren lepelties en zo, het mot er allemaol mooier en chiquer oetzien as bij mien zuster, want die schept altied zo op over heur grote hoes. En een tuun groot genug um een tuunman in te huren. En ruimte veur een pony, dat wil ik ok allemaol hebben.

Mien: *(Grist hum de emmer oet de haand en giet umstandig met veul water flink aan het dweilen met de mop)* An de kaant, ik moet erbij! *(Drukt Mans in zijn stoel)* Bienen omhoog, of der oet, ij moet mij niet in't pad lopen as ik an het poetsen bin, dan weet ij dat alvast.

IJ kunt beter even een poosie naor boeten gaon, dan kan ik even goed mien gang gaon. En boeten je klompen an doen, anders wordt je schoenen smerrig en die wil ik niet in hoes hebben, begrepen? *(drukt hem naor de deur)*

Mans: Bin ij nou hielemaol gek worden? Nou is het genug, der oet , oet mien hoes en rap een beetie.

(gooit heur alles achterna zölfs de emmer water)

Grote tied, wat een mens, die wröt je d'r hielemaol under aj niet oppast.

(nimt even de tied om bij te kommen)

Scene 8

(Roel en Ingrid op)

Roel: Mans, ik moet je hartelijk danken dat samen met Ingrid mij de ogen opend hebt, wat bin ik toch een stomme koenavvel west dat ik zo slecht um heur dacht heb en zo weinig dingen samen met heur daon heb. Toen ik heur zo bij je op schoot zag zitten weur ik zo verschrikkelijk jaloers op je, ik kun je wal slaon.

Mans: Gelukkig dat dat niet daon hebt!

Roel: Ik moet mij veul meer um Ingrid bekommeren, want aans bin ik heur kwiet en dat is het leste wat ik wil.

Ingrid: Wat fijn, hè Mans? Wij hebt een hiel goed gesprek had, dankzij jouw mooie plannegie, dank je wel, jong.

Maor hoe is het je met de andere kandidates vergaon?

Niet zo hiel goed, geleuf ik. Die iene zee dat wij an de kaant mussen gaon anders miste ze de bus en die andere dee niks as schelden en tieren en zweide met de ragebol in het rond, dat was gewoon levensgevaorlijk.

(gef bossie wol van Hilda)

Kiek, dit verleur die iene, tjonge, jonge, wat een kleur, daor zuj mar een trui van an moeten hebben.

Mans: Ik wil het er niet over hebben, het liekt wal of er gien normale vrouw meer op de wereld is. Dan blief ik net zo lief allennig.

Ingrid: Maor wat veur een wicht woy hebben dan?

Mans: In elk geval möt ze in mij geïnteresseerd wezen en niet allennig maor over zuchzölf praoten en mij nimmen zoas ik bin. Ze möt gezellig wezen en heur eigen hobby's en wark hebben.

Eigenlijk wil ik een hiel gewoon normaal leuk wicht.

Ingrid: Dat kan dan toch niet zo moeilijk wezen, zuj zo zeggen. Mans, wij zult je helpen zuken, maor vandaog niet meer, want Roel en ik hebt eerst nog even wat aans te doen.

(gef Mans dikke smok) Kom met naor hoes, Roel en vanaf mörgen zuukt wij veur Mans een hiel gewoon normaal leuk wicht. *(af)*

Mans: Precies, dat zuuk ik: een hiel gewoon normaal leuk wicht.

Eigenlijk zo ien as ij... Ingrid ...

Maor ja, ij bint al bezet. Nou, ik gun je zo'n fijne vent as Roel, ok al hef die je niet verdiend...

Voorlopig hol ik het maor gewoon op een koppie oploskoffie en mien postzegels.

(legt kraanten en de postzegelalbums weer zoas ze lagen, döt oploskoffie in de beker en giet er vergenoegd bij zitten. Giet dan weer in postzegelalbum kieken met de loep, net zoas in het begun van het stuk.)

EINDE